



Statüts Società da promoziun sport da skis Regiun Parc Naziunal

Versiun 25.10.2018

I. Nom e domicil

Art. 1 Nom / domicil

Cul nom società da promoziun sport da skis Regiun Parc Naziunal (RPN) consista üna società cun domicil a Scuol tenor Art. 60 ff dal cudesch civil.

II. Böts ed intenziuns

Art. 2 Intenziuns

La società ha l'intenziun da pussibiltar finanziarmaing a giuvenils da la regiun Engiadina Bassa/Val Müstair/Samignun la partecipaziun a la spüerta da trenamaint e concurrenzas da la classa da sport dal IOF. Per quai fa gio la società cul IOF üna correspundenta curvegna da prestaziun.

La società es politicamaing e confessionalmaing neutrala.

Art. 3 Dovairs

Ils dovairs da la società sun:

- a) Acquisiziun da finanzas pro sponsuors e partenaris (raps publics) locals e regiunals
- b) Sustegn finanziel e / o material per atlets ed atletas da la regiun Engiadina Bassa – Samignun - Val Müstair in quel sen chi vain pussibilità la partecipaziun ad üna cella da trenamaint regiunala tenor las directivas da las federaziuns correspundentas.
- c) Sustegn da las cellas da trenamaint sco liom a la regiun ed als clubs locals da sport tras lavur publica e chüra da sponsuors.

III. Commembranza

Art. 4 Commembranza

La società consista our dals:

- a) Atlets ed atletas
- b) Genituors dals atlets e da las atletas
- c) Delegats dals clubs da sport dals atlets e da las atletas chi trenan illas cellas da trenamaint
- d) Ulteriuras personas natüralas e giuridicas chi arcugnoschan quists statüts

Art. 5 Categorias da commembranza

I dà las seguaintas categorias da commembranza:

- a) Commembers e commembras
- b) Club da bruonz
- c) Club d'argient
- d) Club d'or
- e) Co-sponuors
- f) Sponuors
- g) Sponuors principals
- h) Sponuors da team
- i) Partenaris (raps publics)

Per tuot quistas categorias valan ils drets ed ils dovairs da commembranza tenor ledscha e statüts.

Art. 6 Admissiun

L'annunzcha po gnir fatta in scrit sur la carta d'annunzcha, per e-mail o tras il pajamaint da la contribuziun da commembranza.

Art. 7 Fin da la commembranza

La commembranza scada cun sortida, mort o exclusiun.

Sortidas da la società da promoziun sun d'annunzchar in scrit a la suprastanza fin als 30 avrigl. Otramaing cuntinuescha la commembranza.

Ûn commember chi fa don als interess da la società cun seis deport po gnir exclus da la società da promoziun sün dumonda da la suprastanza e sün decisiun da la radunanza da commembers.

IV. On da gestiun e contribuziuns da commembranza

Art. 8 On da gestiun

L'on da gestiun düra dals 1. avuost fin als 31 da lügl.

Art. 9 Contribuziuns

Las contribuziuns annualas vegnan fixadas da la radunanza da commembers sün proposta da la suprastanza.

Las ulteriuras contribuziuns ed ils sustegns dals sponuors vegnan fixats da la suprastanza respectivamaing cumbinats cun contrats correspondentes culs sponuors.

Art. 10 Responsabilità

Pels obligs da la società da promoziun garantischa unicamaing la facultà da la società. Tuot las responsabilitats persunalas da commembers e commembras da la società sun exclusas.

V. Organs

Art. 11 Organs

Ils organs da la società da promoziun sun:

- a) La radunanza da commembers e commembras
- b) La suprastanza
- c) Il post da revisiun

Art. 12 Radunanza da commembers

La radunanza da commembers e commembras es l'organ il plü ot da la società. Ella as cumpuona our dals delegats dals clubs da sport sco eir dals ulteriurs commembers e da las ulteriuras commembras.

Mincha commember e mincha commembra chi ja pajà la contribuziun annuala fin als prüms da settember respectivamaing ils delegats dals clubs da sport e las personas giuridicas disponan d'üna vusch.

Art. 13 Cumpetenzas

Ils dovairs da la radunanza da commembers sun:

- 1. Elecziun dals dombravuschs
- 2. Approvaziun dal protocol da l'ultima radunanza
- 3. Acceptaziun dal rapport annual
- 4. Approvaziun dal quint da gestiun e dal büdschet
- 5. Acceptaziun dal rapport dals revisuors e dis-charg a la suprastanza
- 6. Fixaziun da la contribuziun annuala
- 7. Elecziun da la suprastanza
- 8. Elecziun dal post da revisiun

Radunanza ordinaria

La radunanza ordinaria vain arranschada minch'on fin la fin d'october. L'invid ha da gnir tramis in scrit fin il plü tard 14 dis avant cun indicaziun da las tractandas.

Art. 14 Radunanza extraordinaria

In cas da bsögn po la suprastanza clomar aint üna radunanza extraordinaria. Cun üna dumonda in scrit d'almain ün tschinchavel dals commembers e da las commembras cul dret da vuschar es la suprastanza obliada da far quai.

La suprastanza ha implü il dret da salvar ulteriuras radunanzas per discutir problems actuals. Decisiuns nu pon gnir fattas in occasiun da talas radunanzas.

Art. 15 Cumpetenzza da decisiun

Tuot las radunanzas clomadas aint tenor uorden sun cumpetentas da trar decisiuns.

Art. 16 Elecziuns / Votaziuns

Elecziuns e votaziuns da fatschendas vegnan fattas avertamaing oter co sch'ün tschinchavel dals votants preschaints pretenda ün scrutin. Pro üna parità da vuschs decida la vusch da tagl dal president.

Art. 17 Suprastanza

La suprastanza as constituëscha svesa. La suprastanza consista almain da 3 ed il plü da tuot da 10 commembers. Mincha vallada (Engiadina Bassa, Samignun e Val Müstair) stuvesse esser rapreschantada illa suprastanza cun almain ün commember. Ün sez da la suprastanza pertocca a la funcziun dal manader / la manadra da la classa da sport IOF. Üna perioda düra 3 ons ed ils commembers pon gnir reeletts.

Art. 18 Dovairs

La suprastanza rapreschainta la società vers l'exteriur ed organisëscha l'actività da la società. Incumbenzas specialas sun:

- a) Execuziun dals statüts e da las decisiuns da las radunanzas.
- b) Preparaziun e bannida da la radunanza
- c) Restituziun dal rapport da gestiun, preparaziun dal quint annual e dal büdschet
- d) Execuziun da las fatschendas curraintas
- e) Tuot las cumpetenzas surdattas chi nu sun confidadas ad ün oter organ tras ledscha o statüts
- f) Dumondas a las cellas da trenamaint da la regiun, als clubs da sport o ad associaziuns da sport chantunalas e naziunalas
- g) Suottascripziuns da contrats da sponsuors e da contrats da prestaziun cullas cellas da trenamaint

Art. 19 Sezzüdas

La suprastanza vain bannida tenor bsögn tras il president o sch'ün terz dals commembers da la suprastanza pretenda quai cun indicaziun da las tractandas. La suprastanza es cumpetenta da decider culla preschentscha d'almain trais commembers. Ella tira las decisiuns culla majorità da las vuschs, in quel connex ha il president adüna il dret da vuschar e pro parità da vuschs ha'l la vusch da tagl.

Art. 20 President

Il president rapreschainta la società vers l'exteriur. El suottascriva collectivamaing, insembel cun ün oter commember da la suprastanza. Sias incumbenzas specialsas sun:

- a) Direcziun da las sezzüdas da la suprastanza e da las radunanzas
- b) Survagianza da l'administraziun
- c) Chüra da contact cullas cellas da trenamaint, culs clubs da sport, cullas associaziuns e cullas instanzas politicas

Art. 21 Contabilità

Il chaschier administrescha la facultà da la società, inchascha las contribuziuns annualas ed ils sustegns dals sponsuors ed es respunsabel per tuot la contabilità e'l bilantsch da la chascha sco eir per las mutaziuns dals commembers. Minch'on in occasiun da la radunanza preschainta el il quint annual ed il büdschet approvà da la suprastanza.

Quistas lezchas pon eir gnir surdattas al IOF sur üna curvegna da prestaziun.

Art. 22 Post da revisiun

Sco post da revisiun vain instituida ün'agenzia fiduziaria. Ella vain eletta per la dürada da trais ons. Üna reelcziun es admissa. Ella es incumbenzada da controllar la contabilità e da rapportar da quai a la radunanza da commembers e commembras.

VI Schoglimaint da la Società da promoziun sport da skis Regiun Parc Naziunal

Art. 23 Decisiun

Il schoglimaint da la Società da promoziun sport da skis Regiun Parc Naziunal po gnir decis tras üna decisiun da commembers cun üna majorità da 2/3 da las vuschs preschaintas. Uschè lönch cha desch commembers da la società sun prontos da s'ingaschar e manar inavant la società nu po quella gnir scholta.

Art. 24 Facultà

In cas d'ün schoglimaint da la società vain la facultà da la società depositada pro'l Institut Otalpin Ftan cun administraziun fiduziaria e tras l'IOF miss a disposiziun ad ün'eventuala ulteriura società illa istessa regiun. In cas chi nu vain fundada ingüna nouva società infra desch ons va la facultà i'l possess dal Institut Otalpin Ftan per dovrar per la promoziun dal sport da giuvenils (alpin, passlung o assa).

VI. Müdamaint da statüts


Art. 25 Majoritats

Quists statüts pon gnir müdats tras la radunanza da commembers e commembras cun üna majorità da 2/3 da las vuschs preschaintas.

Ils statüts preschaints sun gnüts approvats in occasiun da la radunanza generala dals 25.10.2018 e rimplazzan il statüts dals 06.11.2009 respectivamaing dals 06.11.2015.



Gerhard Hauser
President



Muriel Hüberli
Commembra da supastanza